

671.141
082
11

平谷縣志

元

景虞署端

丙寅冬月

平谷縣志

王溫恭題



繼成平谷縣志序

凡覘人國者必先考其沿革察其政治明其山川人物之美惡觀其風俗教化之良窳而後其國之興衰強弱可知矣一國如此一縣亦然今有人焉於其縣之沿革不知政治不講山川人物之不悉風俗教化之不修而謂吾知此縣事焉可乎平谷爲禹貢冀州之域開化最早據盤山之險形勢極優自唐宋遼金以來爲兵家所必爭之地而豐功偉績照耀簡冊者代不乏人至其物產之美風俗之淳

猶其餘事奈何近百年來而奇偉卓異之士不見稱於當
世哉余自丙寅孟夏奉鎮威軍團長命來守斯邦當是時
也軍書旁午戎馬倉皇于勞軍撫民之餘每欲考其政治
沿革渺乎其不可得蓋縣志之失修與夫修而屢輟者不
知幾經歲月矣幸邑紳王君濟時關心此事自任收檢殘
編慘澹經營不日脫稿舉數百年數十年應修而未修者
一旦宛然修成以垂久遠其愉快爲何如也茲於用付劂
劂之先爰綴數言以爲序丙寅仲冬東豐陳玉符自識

續修平谷縣志序

平谷縣志創於明隆慶六年重修於萬曆二十年清康熙六年邑長任公在陞復爲釐訂雍正六年邑長項公景倩乾隆四十二年邑長朱公克閱踵事增輯此後失修已一百三十餘載微獨陵谷易處滄桑變遷無由考證而忠義節烈潛德嘉言亦將歸泯泯矧有清末造變政維新迨共和成立國體改革地方政務日見劇繁若學警自治諸端其機關設置之時代組織之職員不有紀述何以昭示來

茲民國五年邑長沈公銓洞鑒及此爰議續修請於尹憲

志襄王公深爲嘉許乃延邑紳調查事蹟兆元曾膺採訪

後以沈公去任未竟全功繼任者李公樹珽奉上令敦促

成書復延士紳續輯兆元仍爲採訪而李公旋調永清又

中輟後之官斯土者均未關懷邑乘續修之事遂寢焉自

清中葉迄今邑之文獻無徵雖屢議編輯而卒未成書良

可慨也九年夏月浙省王公沛來尹茲邑有舉墜振衰之

志與兆元會晤之初詢以邑志修至何年遂詳陳之公乃

銳意續修復請尹憲備案置修志局屬以纂修其事兆元
識譚才幹奚足勝任顧自爲採訪留心軼事積有文稿甚
夥又舊志原梓剝殘字跡零落讀之甚難因思補之爲將
來修志基礎時加參閱胸中略具成竹故勉爲擔任焉於
是考諸類碑斷碣徵之各種書籍將舊志之殘闕補竣其
訛略處亦稍事損益列於新志之前又原有輿圖已不適
用另繪全縣地圖暨縣城圖至是番之續纂非第乾隆以
後之事蹟按類編輯卽從前之事蹟亦加增補三閱月而

歲事兆元於此三月中策蹇調查閉戶校訂焚膏繼晷以期速竣惟見聞舛陋未能博採遐稽仍待宏達君子復加蒐輯匡厥不逮是所深幸也並序其緣起作輟以識成書之不易民國九年十二月邑人王兆元撰於修志局

清訓導李柱明重修平谷縣志序

康熙六年

古有列國史繼爲郡邑志志以紀事也事蓋乘時也時遞
轉則事遞新故創於前不可無輯於後期於踵事增華紹
明前規也平志起於明隆慶之六年重修於萬曆之二十
年迄今蓋七十餘載矧大清定鼎百度維新豈邑乘一書
仍蹈舊轍而不思所以纂修之乎雖妙峯瑞屏碣石洵水
諸勝跡未之或改然其間戶口之登耗賦役之煩簡與夫
賢良循吏忠臣孝子義夫節婦暨水旱祲祥陵谷桑田之

變未列史冊者比比然兼之字畫剝落多魯魚豕亥之訛
編次失倫貽掛一漏萬之誚何以徵文獻而昭來茲則今
日者誠釐舊更新之一會也幸邑侯任公以三秦宿儒剖
竹盤陰桑下雉矯河陽花秀其循績俱在民口碑間忽於
棊心暇暢毅然以修志爲己任適奉有諸上臺纂輯之命
公喜而言曰吾願可藉此以成矣因以採集屬之紳衿謬
以校勘責諸不慧而訂其簡蔓正其得失易鄙俚爲雅馴
悉出公手要以賞賢紕奸信今傳後無失吾尼父春秋家

法而已今一展讀之則見其簡而周詳而整臚列嚴明殊
無剩義嗣是采風者瞭然顛末而無燭前暗後之虞尹茲
者居今稽古而獲調停鈞節之術且使邑之人覽曰若俗
美若俗惡若人正若人邪當必踴躍竦息法戒分途則是
志之用意微立教遠也舉昔七十餘載之曠典一旦增而
完美焉他年國乘昭垂非留錦製鮮鮮耶編竣余固樂觀
厥成爰述其重脩之由公以余爲知言遂弁而壽諸梓

清知縣項景倩補脩平谷縣志序

雍正六年

今天下四海昇平萬邦効順星垂聯璧之祥河獻澄清之
瑞苟非德教淪浹聲名洋溢烏能臻此美盛哉聖天子猶
不自暇逸勵精圖治賢執政冀得人而事銳志搜羅余以
郡博微員謬廁薦牘荷皇上隆恩召見勤政殿天語溫
和豐承清問敬陳一得之愚遽獲九重之譽小臣何人能
感激殊遇更爲清慎自矢乎況余才短識庸驟膺民社恐
錦難學製履餽深憂耳幸值蕞爾之隅實掩簿書之拙下

車後披閱邑乘見夫有明一代科甲繩繩且多顯秩暨閱
國朝所載不但售槐捷柳者罕有其人卽歲薦恩擢以及
忠孝節義之倫亦落落晨星空編白簡將何以傳示來者
耶屈指康熙丁未令博諸公踵事補脩至雍正戊申前後
六十餘年之久事實概未採錄行懼其湮沒而不彰也微
邑紳衿請余亦將整殘續缺謀之剗剗以備一代之徵矧
紳衿頻以補脩爲請乎余越疆末士也僻處東南偏境素
慕燕趙雷封雖無馴雉遊魚之異頗有脩廢舉墜之心標

功名耶闡德行耶紀文章耶表人物耶非長吏之責而誰
責乎爰出囊俸哀集衆捐總六十餘年中事實備爲採錄
付梓以期毫髮無遺余之志也計向來罅漏一時未能補
綴姑舉其可考者俾後之人見美而法見不善而懲由是
風俗益歸於厚人心益進於醇四海萬邦沐浴昇平之化
翱翔効順之風庶幾報聖天子於萬一耳是爲序

清知縣朱克閱續補平谷縣志紀略

乾隆四十二年

邑之有志猶國之有史也上古結繩而治不可考矣尙書其紀傳之祖乎春秋其編年之宗乎周禮職方氏度天下山川險易戶口阨塞之數畫爲版圖行人探四方風俗上之太史邑之有志與國史等我國朝典重史館官隆總裁欽定明史御纂一統志暨四庫全書典墳邱索無以尙之近奉諭旨考證日下舊聞核實纂輯使天下萬世知皇都閎麗信而有徵凡畿輔州縣星羅棊布無不各因志乘追

尋往蹟遙溯前徽以煥文治之光華最爾平邑舊志殘缺
未經釐訂康熙六年歲次丁未邑令任公在陞敷陳軼事
命工剗削雍正六年歲在戊申邑令項公景倩復爲採錄
付之梓人皆因前明隆慶遺文踵而續之迄今五十年矣
愚以中州鄉薦才識謏陋承乏茲邑於課耕課讀勸紡勸
織之暇集諸紳士廣爲採擇奈簡斷編殘文獻不足僅卽
數十年之文武職官恩拔歲貢籍貫姓名任事考授年月
補而增之至於闕則仍闕以俟後之宰是邑者具經天緯

地之才著立海垂雲之概遐稽近考舉元明諸公之餘文
本朝諸公之著述重爲鉅章鴻裁以副我皇上稽古右文
之至意是則愚之所厚望也夫